

德清縣新誌

羅迪先
署簽



德清縣新志卷十一

藝文志 二

紀載

奏定文廟祀典記

清俞樾 曲園

咸豐六年十有一日河南學政俞樾疏言昔孔子周流列國同時賢大夫之克協聖心者於衛則有伯玉於鄭則有子產而觀論語所載則於子產尤稱道勿衰蓋孔子在鄭嘗以兄事之及其卒也爲之流涕今文廟從祀有蘧瑗而無公孫僑非所以遵循聖心修明祀事也比因校士再至鄭州登東里之虛渡溱洧之水緬懷遺愛想見其人夫附驥益顯非必及門衛鄭兩賢事同一體瑗既從祀僑何獨遺樾愚以爲先賢鄭大夫公孫僑宜從祀文廟大成殿兩廡又按孔子有兄曰孟皮故論語稱孔子以其兄之子妻南容而史記弟子列傳有孔子兄子孔忠蓋皆孟皮之子也孟皮言行無所表見然既爲孔子之兄則亦祀典

德清縣新志

卷十一
藝文

一

所不可闕者孔子曰所求乎弟以事兄未能也今以孔子爲帝王萬世之師京師郡縣莫不崇祀上及其祖下逮其孫而獨缺其兄揆之至聖之心或者猶有憾乎樾因言公孫僑從祀大成殿西廡位林放上孟皮配享崇聖祠位西向第一天子俞焉于是上自國學下至郡縣學咸奉行如詔書禮也其明年樾以人言免官自惟奉職無狀不稱朝廷遣使者之意惟此二事祀典存焉且孟皮之議實發於先父蓋先父有詠古詩四章其次章專爲孟皮未與配享而作奉先承志幸無失隊念漢世如乙瑛請置卒史韓勅造立禮器咸刻石勒名垂示後世作而不紀後無述焉爰著本末以愆方來乃爲頌曰英英子產君子之風兄事勿替尼父所欽宜祀于廡以尊孔心並彼蘧氏爲聖作朋孟皮弱足不良能行有開必先實惟聖兄所求未能聖心悲傷配食先代祀事孔明 實萌集

水南文集序

明蔡汝楠 白石

苕溪之水發自天日德清其上遊也山川聳秀瑰瑋卓犖紆澹窪匯哀窳而爲

屏障融結而爲人才越自南宋沈麟士主講吳羌繼之以休文之博洽吳潛之經義此其選也緣是人文輩出代有述作蓋嵩高降神或其理歟邑治之東有水南先生焉總丩岐嶷釋褐司諫旣蹶而甫陟遞謝而旋歸其宦情殆泊如也遂乃留心著述前後刊摹播行久矣惟水南一集其子綬甯尹夢徵謀鋟諸梓未果姪翀以懷慶別駕改經歷閩閩實刻成之然尙未全也間日求文於蔡子白石予惟先生前達二君老友也樂爲之叙曰有天文有人文天地之文章萃於光岳吾人之文章發於言詞其致一也典謨三百篇尙矣屈宋而下浸及六朝唐宋其間操觚染翰之士大率拂抑幽隱投閒置散者爲多何哉文之在人者必得天地之精江山之秀林泉之逸趣然後發而爲文詞洩而爲疏章暢而爲歌咏寫情寄懷點景寓興要有獨得其真而勘破化工之妙者蓋神以凝思思以宣志志以致氣氣以達辭辭以會題題以狀物胸次磊落含吐精華燦然煥然昭耀簡篇無怪也使夫官塵之羈跡簿書之勞形則固將輟思停毫候迎

判理之不暇矣甯能吟咏竟日也耶先生年未強仕挂冠桑梓結廬兩山之間屏絕人世紛華塵鞅手摩簡編銳情著述雖祁暑盛寒不廢朝夕故其灑翰盈簾卷帙幾百用心亦良苦矣昔人有言作文固難評文亦不易自文選出而文有定格音韻作而詩有定律以今考之文貴冲澹賦尙典則詩宜蘊藉詞尙灑脫騷雅之宜瞻麗歌調之宜鏗鏘舍是其何取哉今先生水南一集衆體悉具且又根極道腴發揮理窟優游清深温和簡勁記傳則織簾之注疏押咏則休文之聲律前事之不忘後事之益信也由今追昔倡和其有人哉先民有作百司承式是固宜錄以垂不朽也已先生之奏議具國史履歷具邑乘志况具家傳考摭具別籍籍各有名首各有序總若干萬言今長往矣其餘響餘韻則尙在焉斯亦一邑之光也古所謂鄉先生歿可祀於社此固其人非歟因銓次顛末標之簡端嘉靖甲子歲仲冬之吉賜進士第南京工部右侍郎同邑白石山人蔡汝楠

餘不溪記

明 胡允嘉

餘不溪襟帶清邑每過輒樂其清嘉壬子孟秋偶得半日間蕩舟乾元山下板橋跨曲港水色如碧油桑竹映發使人幽絕山麓平松萬株日影穿射涼風拂襟暑氣忽滌去余里而近者南則超東則洛北則乾元金鵝互峙爭高平時登陟常有怯懼之色今步山麓遙在眉睫氣已凌之矣樵子復指余坦道迤邐如蛇盤中亭再下視一邑萬竈粉垣如畫若水貫之螺髻之山若跂若倚田苗正綠烟嵐雜起亦領人意去亭稍陡峻再折而至前架一亭插槿爲藩其上兩楹中供大士香几潔清不見人影簫聲雜笑語裊裊自空中出余澄坐久之

府志

德清山館記

明 許孚遠

德清山古名烏山考唐志以德清名邑因名山是山尊嚴龐厚西對金鵝而乾元百僚在其左右復有支脈盤旋橫於襟帶之間遠近峯巒森羅如畫余家世祖山爲居邱隴之所依蓋旦暮春秋而在於山其入山稍深處窈靜可隱余除

地而築焉伐木爲材壘土爲垣疏泉爲池凡營構之具半取諸山而得於是當山之中爲樓數楹曰尊樂樓前爲軒曰朋來軒闢徑爲園曰逍遙園池在園曰獨照池距樓北百步而近崇爲臺曰函虛臺大都因地之宜而從吾之便取其意不求其工故工易就也嘗坐小樓之上萬樹蒼茫照映几席鳴禽之音間關在耳且清風時至明月滿樓看飛鳥於雲際聽流泉之涓涓所以發吾之性靈而除其煩穢之思者蓋觸處而在或雲霧之朝風雨之夕閉戶靜息亦足以收斂性情暇則與二三子振衣高岡徜徉幽谷詠歌唱和壺觴自隨不知足之蹈之手之舞之者也

奉萱堂記

明南京刑部左侍郎 張瑄

元泰定間德清談公文禮築堂奉其母潘夫人邑人閻仲斌繪爲圖名曰奉萱且題詩於上以褒美之一時士大夫能言者又從而歌詠之文禮之曾孫福建僉憲俊字時英持以求題因得考其巔末圖作於丁卯距今九十四年矣文禮

奉親之時在丁卯前蓋百數十年事也文禮方五齡而父允恭甫棄背賴潘守節撫育以養以教以娶以成母之恩同覆載宜何如報哉爲之堂以奉養之以盡人子之道耳然堂不曰奉親而曰奉萱者蓋取詩曰得讓草言樹之背之意也說者曰萱能忘憂背堂之北母所居也故以萱貺母欲忘其憂也吾想其登是堂也問安上述先意承志甘肥輕煖所以適其口體者無不備暇則象服版輿遊騁心目母樂子孝子喜母壽謂之曰奉萱信乎其能奉萱矣然人得樂此終己之身者少矣况能下逮其子若孫若曾孫若玄孫者乎得此於數十年少矣况能傳代至於百餘年之久乎是蓋有由然也余垂髫時識文禮之子思忠與思忠之子彥誠爲忘年交思忠甫爲人長厚不爲岸谷援例授冠帶逾九十而終彥誠敦朴孝友克世其家以子俊貴封監察御史今已七十七矣康強如少壯人時英以名進士起家聲譽藉甚非所謂孝子不匱永錫爾類節義忠厚孝友之行有以積累於前而以倍植於後者乎吾及見世之豪右隆然赫然而

固勝有談氏者矣然不一再傳子孫有行乞於市者甚則肆屠致劇殄滅漸盡無他以勢利爲仁義多行可愧者耳譬之絕澗之松溉之以靈泉濯之以靈秀故能拂雲霄傲霜雪歷千載貫四時而不改柯易葉豈如他草木絢織濃於一時封植不厚嚴霜一降摧落俄頃榮瘁迥異者哉時英其尙承先啓後務爲此勿爲彼哉吾知談氏將來之盛又異於今堂曰舊而名曰益新矣是爲記

始遊蠡山記

明末
遺民 蔡方壺

蠡山者清溪東南之山由吳羌烏巾過峽而連山生焉登臨數百步其嶺秩然而西北向者曰馬回馬回者蠡之起脈而初從焉者也春秋勾踐霸於越范大夫蠡扁舟以去勾踐追之至此嶺不得乃還故曰馬回也山以蠡名者以蠡常居此也其嶺有祠焉曰范大夫祠歲時伏臘士人奉以爲神棟宇凡三進上有泉一清瑩澄澈冷然善也歷祠南下有井井穴自山腋籠以蔓草銀床欹側於路水多泥淤不可飲問諸途人曰陶朱井也歲久不甃故也東行數十步曰石

庵四周皆石石皆奇形猛狀相制如搏擊繚以籐蘿外有曲徑可抵石庵者舊常有僧結茅棲此而石則其大凡也庵左升二十餘步有穴自上而下天日儼然而風雨不至上盍覆下塘伏也故曰石屋也石屋西上奇峯插雲怪石林立鳥道盤紆而可通杖履者可坐憩可漱濯有池焉曰劍池池曰劍者以蠡嘗沈劍於此劍亦神焉風清月白往往出沒水面成化間爲漁人所得售之蔡氏蔡族故清望獲是劍者予十一世祖也祖諱繩字思明傳二世而寢室火劍從火中飛出環堵而觀者驚相異也孰意仍歸於池復如初焉自劍池北下蜿蜒其道桑麻廬墓樵者牧者漁者刈穫者築場圃者往來行李者道相接也相接而相映於清流之間若形在鏡中而呼吸之聲嚕啞若問答者石壁也石壁北迤而與之俱迤者爲石湖一曰蠡湖湖生石中不通舟楫臨以峭石百仞參天叢樹箐篁倒懸交錯落鑑於水若荇藻之舞滄浪鱗鬣喁喁樂可知也是遊也予與同曾祖兄祉先以及南渡始祖秘書公分派嗣莊斗先者相左右焉惜乎不得曾遊之人與之俱遊而山僧土著頑蠢無知不解指點其林巒之勝以盡歷其所謂八景者是則予之不幸而亦山之不爲予歷者之不幸也或曰子生長於清四十餘年矣今始一過焉山誠幸而遇子矣其不爲子歷而若不幸者安知不留其幸於他日也故爲之記以俟之而有待於後焉

蠡山記

清 徐 倬

吾邑無崇山峻嶺而有清流激湍城外諸山極高不過百仞或爲岡或爲阜或介或連或臥如修蛾或豎如高髻離離然錯立於溪之上下每至雨餘水漲汪波盪漾羣山皆浮動山水相涵釀成空青縹碧之色遊者不必坐筍輿扶筇杖祇一葉之舟延緣而往浮嵐煖翠撲人衣袂真如身至蔚藍天也而諸山之勝蠡山爲最山以范蠡得名相傳泛五湖時取道於此故友唐聞宣曰此譌也蠡者羸也卽俗之所爲螺也水經註云睢陽有蠡臺迴道如蠡今此地有巨漾山峙其中猶蠡之浮於水面其說良是然俗傳已久邨人已祀蠡於山何能易之

但牽入夷光因有燕支洞妝臺諸蹟則譌之又譌者耳蠡山之勝以青魚潭石屋劍池爲最青魚潭在山之足其形修如虛舟約有數頃左有小嶺翠竹蒼松鬱鬱深茂右有峭壁俯瞰潭中潭水澄澈作綠玉色深不知所底時見儵魚出沒其間石屋在山之椒玲瓏嶮岬如堂如宇可坐數十人劍池則涌出於山之巔仿佛龍湫雁宕也水色深靚幽寒之氣逼人池上有五色石丹砂翡翠森然劍立三處皆爲奇觀余每歲必一至或再至三至嘗語人曰蠡山吾白首之石友也去歲以事故未及今歲力疾一往并挈塾中諸子同行至青魚潭藉草而坐息心澄觀神明清滌友人慇懃至西茅山看石筍遂不及問石屋劍池過門不入得無移文及之歟從潭上取徑而東至采石菴小憩僧人肯爲前導路甚鞣轉拙折又多桑枝礙輿輿人必曲項折腰而過怨聲喃喃不置及至西茅所謂石筍者林立池中然遜蠡山遠矣卽取原道歸道旁有巨石狀如屏橫空孱顏高數十丈友人曰此上可題名予笑曰無庸也夫題名者欲留其名於此山

也而此山已爲蠡所有矣吾輩碌碌卽使大書深刻其上不過風雨剝蝕苔蘚漫污爲牛磨甓觸之場耳舍今日之樂圖身後之名其得失何如也急返舟理歸棹濁酒一杯聊舒諸君子登陟之勞回望煙螺數點戀戀有情尙想褰衣濡足於異日嗚呼可謂不知老之已至者矣皆維甲申仲春客爲陳天柱唐元龍程樹宋嗣方八十二翁之孫二人志莘志巖曾孫一人甫十齡亦能步趨至十里不倦喜其在童齒時卽有濟勝之具也故并記之

節孝詩册序

清翰林歸安
韓敬

劉以升進士旣登第卽以兩世節孝事陳情于朝有詔表宅旌門有帛賁于閭醴餼陳于案一時詞苑播諸聲歌明國家錫類之弘踐孝子祈天之志非尋常紀述也胡太君以廿六稱未亡哺四孤事四白勉支衰祚以延殯蔡邱夫人繼之亦廿四彈寡鵠併形寄命疊霰重冰以有今日蓼境盡而蔗來寒壑枯而泉泛山迴反壤已封老姥之陵春到養堂正曳循陔之彩亦可以無遺憾矣猶永

念贈公以身殉母哀深吳隱淚盡顏丁故一生不踐石面不解綿溫卽對策上書未嘗一日忘蓼莪之什也至于封鮒築鑲傳餐墮魚昕夕凜凜璇壁不毀清白日沿以升自此委質王家無一而非其慈戒所及矣國制旌書與封誥不兩覃者也松筠之節先伸鼎釜之精徐沐以升一門遭際適逢其隆甯尙有烏私不得遂者以升曰吾孤也北面而受傳南面而受事皆當以孤蓄之若夙夜匪懈以事一人卽我兩世所謂含章代終者也諸君子幸已勛之敢忘所自遂書以爲子律

仙潭後志

七葉堂記

清許宗彥

山隱隆而不峭者植必盛水溶澆而不激者澤必廣故人之敦龐而安固者其生必蕃吾邑耆德戴先生士宏德厚而貌莊言有宇行有表處事無大小必忠必信尤善治家訓勵子弟慎名節課家人治耕織朝作夜思自壯至老如一日先生齒日益高子孫日益衆嘉慶初元先生之曾孫師恭旣舉子溯先生曾逮

事大父及是復抱元孫身所見者七世邑長吏上其事於省聞之朝賜七葉衍祥額寵其門浙之士大夫多作爲歌詩稱美之許宗彥曰昔漢時嘗置三老孝弟力田常員其詔曰孝弟者天下之大順也力田者爲生之本也三老者衆民之師也惜乎史家重華而輕質不能紀其行事之尤盛者以爲後世法今如先生者非其人歟先生子孫莫不稟訓自飭束修無玷他日見用於世推先生所以治家者以之治人吾知其無不足也語曰德之至者色澤洽行之盡者聲聞遠豈徒蕃衍其族姓而已乎先生今年八十有七而視聽不衰步履如少壯蓋其得全于天者厚矣

鑑止水齋卷十四

徐尹輔詩序

清蔡壽昌爾眉

僕與徐子尹輔交垂十禩矣騎竹之歲卽聞其雋聲盟采以還恆視爲畏友維時歸安嚴處士僑北郭以養痾踵南皮之雅游春華方敷吾黨滋樂裙屐畢至詠歌遂多厥後僕遊陵陽君客顧渚嗟紫筍之味苦甃白蘋以怨遙會處士哀

蟬蛻紅病鶴返素宿草拂踝感深於酒鑪交蘆易分願乖乎吟局今年僕又將
投試京國驅車蘆溝道經吳門行篋暫憩鴻飛遵渚多止一宿獸窮走壙噤不
復嗥尹輔跂停雲以致思慨舊雨之行遠郵示所爲詩若干卷誦諉序言伏念
吾邑山川秀明人士清美明嘉靖之際吾宗子木尚書屏七子之類響成一家
之好言遂使成都楊用修有立鵝天馬之喻毘陵唐荆川有元遠幽微之歎自
是以降能者輩出雖大雅不替而嗣音實難迄乎清初君之先德宗伯公總順
治六家之成蔡會昌一品之集湘管出手芸編等身遠揚韓蘇之芬近空王李
之習至今飛文染翰之士握槩懷鉛之徒蓋莫不以自知堂道貴堂兩家爲圭
臬焉尹輔仰藉通德平視餘子瓊樹挺秀根蟠百圍長嘯弄吭動協九奏洵眉
目之如點覺哺啜而亦佳所居谿樓揖吳羌之遠青漱餘不之淨淥黑蝶栩栩
高士之井未涇金龜湛湛故侯之印安屬或出或處咸歸劫輪歷久不渝厥維
雲壑每當魚鳥貢媚煙霞示冲屏張六重幔捲一角尹輔輒俯仰身世流連景

光惜寸陰於曜靈冀尺表之貞世浴硯之水魚吸多而尾玄讀書之燈膏漬久
以槃翠故其詩有冶玉鍊雪之譽無範鐵陶沙之譏妍詞粲花叢稿束筍神君
控弩則碧玉爲牙佛女縑絲而紅珊作簾眞宰上訴靈襟豁開豈不賢乎眇其
儔矣至若僕者盛年坐凋飢走靡所深思世業之墜非關工詩而窮夙敦苔岑
之懽勉騰繁擁之舌涼風翛起於天末實勞我心姓名互見于集中請事斯語
蛻石文鈔

咳餘詩序

清歸安
朱冕羣

詩莫盛於唐而少陵爲之冠跡其超軼一時跨越百代佩陳芳之麟篆張大國
之螿弧蓋由選理熟精雅材畢聚夔巫淹跡心不忘君稷契致身言皆有物故
能練思純摯結響沈雄踔厲風雲噌吰金石今於蔡子瑜卿之詩見之矣瑜卿
讀書等身研經粹掌爰蟲弋鳥精辨乎六書渴驥怒猊旁通夫八法擷江花於
夢裏驅蘇海於毫端唾地文成凌雲氣壯方將蜚英蓬苑摘藻蘭臺擅清秘之

文章奏承平之雅頌而乃避兵閩嶠橐筆蘇臺江山助其壯遊風雲鬱乎孤抱
小山桂樹長此懷人油幕蓮花依然作客故其鬱伊愴快之氣抑塞磊落之才
一皆宣諸篇章發爲謠咏僕久交元璐因識興宗數通謁於連牆復追陪夫近
局與周公瑾友勝飲醇醪見黃叔度還頓消鄙吝清談霏雪高論縣河就當窺
豹一斑已抵食鷄千跖近復出其陔餘詩以示余發原小雅拓宇楚騷陶冶性
靈發揮身世蘭章作賦不無危苦之詞曲江感懷早樹堅貞之志清商三奏變
徵一聲催落葉之豪吟偕浣花爲同調茂矣美矣蔑以加矣而僕尤願瑜卿翔
聲雲路振采天衢律應歸昌集成鳴鳳是則編者特嚆矢之先聲濯波之鼉采
也辱承雅愛委構弁言不揣構愚漫爲隍引驥旄忝附幸已留卷尾之名蠡管
徒窺得毋著佛頭之糞

安雅堂詩存序

清 趙景南 鑄統

歲戊子夢漪女史執弟子禮來見手其先人僊崖觀察安雅堂詩云將付梓問

序於余余維觀察以書生從戎屢上奇策累功而顯疑其人必矜才使氣鋒峻
峻不可近及讀其詩則溫文儒雅檢才若不及固藹然君子也然後歎以淺見
測人者妄矣觀察服官四十年以實心行實政仁惠慈祥碑鐫民口先我而言
者詳矣復何贅然有不能已於言者夫吾輩窮年弄筆衫袖盡烏聳肩濡首嘔
心鏤肺偶有所獲便詫爲至寶以爲傳也必矣詎後起不肖目無一丁從而訕
笑怨詈之謂先人不貽我良田五百頃廣履千萬間區區牛腰一束紙將焉用
行且糊窗糊壁覆瓿覆盎訂爲甲乙賑簿甚至投棄廁中底於不堪問而後已
其生文墨知己或顧而憐之則等諸惜字故事欲如沈學士杜舍人之傳昌谷
集者十不獲一子弟或賢且肖則又限於才力刊一行字類挽百石弓經年累
月不能決束置高閣一任鼠竊蠹蝕而不知偶發故篋則剝落殆盡存者不什
一矣夢漪以女子身能珍其先人之詩且能傳其先人之詩則是觀察之無兒
觀察之有兒也觀察有知其亦含笑九泉也夫有感而書序觀察詩非序觀察

詩耶噫

德清留嬰堂序

清邑令
程熙增 康侯

竊以事貴立法法在得人古無不敝之法有相需之人此興替得失所攸繫也
邑城留嬰堂者創自雍正十二年堂基爲監生戴百齡耆民黃繼麟所捐其經
費則前縣錢公學洙首捐廉銀百六十兩復經紳士沈作楫童士紳等極力募
勸以足成之洵善舉也迨咸豐庚申洪軍入境堂屋半毀生息銀款蕩焉無存
同治丙寅邑紳蔡君兆騏丁君覺源等稟請上憲撥款修葺並勸猪羊魚絲各
行按年捐助以資堂中經費其時肅清未久民力拮据嬰孩待哺者甚多全賴
斯堂以生活之蓋駸駸乎復舊觀矣光緒初蔡君丁君既沒堂務交許紳士奇
士英接管十餘年來災歉頻仍嬰口繁而捐數寡恆慮入不敷出今春及秋許
紳昆仲又相繼殂謝權其事者將堂中冊籍及餘款五百六十二千一百六十
一文呈繳到縣余思留嬰堂之舉爲邑城嬰命所關創者因者不知幾費經營

始獲有此規制今當繼往開來之際不爲慎選其人坐令斯事蹶而不振是司
牧者之咎也徐君本衡施君涵徐君士駿肇基皆邑之好善君子爰請公同經
理堂事諸君皆欣然樂從以爲舊時規畫尙有未盡臚舉堂規十則以示余且
欲以每年出入欸目於歲底刊刻徵信錄余曰善斯堂立法於斯爲備斯堂得
人亦於斯爲盛矣一邑之幸豈非余之幸哉因喜而爲誌數語於簡端

塵南軒詩序

俞 樾

先君子初娶於蔡蔡固吾邑鉅族而外大父漢章先生亦名諸生也五老之榜
未登一鬢之聲獨雋桑維翰之意氣鐵硯留銘李長吉之才華玉樓赴召文章
散佚門戶凋零簾雖有子而堪貽硯已無孫之可授棧癸丑假旋晤厚齋舅氏
乃其嫡姪也坐渭陽之館每共清談歌下里之詞謬推同調始得敬讀先生塵
南軒遺詩若干首筆墨之痕欲化煙霞之氣猶清存此古錦之一囊亦是吉光
之片羽然而陶泉明之集并無甲子可編王遠知之書幾爲六丁所攝偶向死

灰檢出重將生紙鈔來元酒太羹不是人間之味高山流水長存絃外之音嗚呼先生之心可以無憾矣夫閭闔衣冠之句奚所取於山林微雲疎雨之詩未足登於廊廟詩無定格人有攸宜先生既抱璞而居遁奇不耀以故儲王雜興都從田野之間甘石著書或及鹽米之細視世之弼中彪外者若有殊焉然而白香山之體以近俗而彌佳邵康節之書雖打乖而可喜果語言之入妙少少許便可勝人若雕刻以求工塗塗附轉嫌乏味讀先生詩者正以其詞之近而見其旨之遠焉若必奉兔園冊子作狐穴詩人瓊岳銑溪獨成澀體虵神牛鬼自許霸才又豈足以論詩哉厚齋舅氏珍此楹書命爲弁語嗟乎魯靈光之殿久圯於當年魏正始之風尚存於今日愧非元晏未足傳左太冲之名倘遇次山請更定孟雲卿之集

重修覺華寺序

清 桂山

蓋聞白馬馱經梵唄始傳於震旦青鸞啓宇蘭若徧列於坤輿創之者固功德

無涯修之者亦善緣最勝茲有吾里新塘覺華寺者像迎大士殿啓大雄戶被慈雲樂土悉登仁壽門開甘露羣生成沐庥和仰日月之垂光千秋法注祈雨暘而應驗三竺臺分所以地載輿圖剝詳邑誌有由來矣粵稽前代久著莊嚴備飾瞻仰自康熙十二年徐蘋村宗伯庀材復建至乾隆八載沈述震孝廉捐資重修迄今百有餘年雨蝕牆垣雲頹棟宇欲諸公之掛錫須衆士之施金庶梵宇重新遐爾嗅旃檀之氣琳宮式煥昕夕聞鐘鼓之音豈不懿哉是所期也謹序

游歷地球圖紀

清 傅雲龍

雲龍遵廷諭出洋游歷之國六日本也美利加也秘魯也巴西也英屬地加納大也日斯巴尼亞屬地古巴也而舟車所至假道層出於是繇日本國而美利加合衆國而英屬地加納大而日斯巴尼亞屬地古巴而新加拉那大國而埃及瓜度國而秘魯國而智利國而巴他峨尼國而英屬地巴別突司島而丹屬地

先塔盧斯而美利加而日本凡往還一十有一國歷程一十二萬有八百四十四里異途無論已卽往還同航太平洋而潮線亦異往時起緯三十六度五十七分屈曲北行四十五度十六分又少南行三十九度二十二分而至美利加之三法蘭昔斯哥卽舊金山也爲日十八地自西而東舟自西而東日速十七分故閏一日於其間還時較往時更北數度行日十五地東行舟西行日遲十七分故少一日算學家所謂循大圓弧而行之理非此無以見也緯綫近北愈狹圓弧愈小程以狹而省卽行以省而速所謂大周行船法非歟凡繪地圖球面有三一以赤道爲圓界曰平球是猶置身北極外而俯視之也南亦如之如僅繪游歷加納大圖此法庶其可乎蓋與我京同近北極也一以某處地平爲圓界曰偏球游非一地無可概此一以子午圈爲圓界曰正球圓錐切綫之法不外乎是或謂航海難問面積何若墨加禱法乎曰大周行船法省於墨加禱圖中之程多矣航海者先視圓弧之大小次定行舟之曲綫如由橫濱至三法

蘭昔斯哥欲東先北此其大驗識游程往還謂爲切綫法之球可謂爲大周行船法之變格亦奚不可

游歷英屬地加納大圖經餘紀

清 傅雲龍

雲龍游時之久暫未嘗不視歷地之廣狹若加納大大於英三島者三倍而游時最暫無他一限於時一限於費也雖然天之經緯地之沿革兵制之異同商舶之出入工肆之良窳農務之進退漁獵之損益學校之大小疆吏議紳之黨伐翁打里約貴壁之險要罔弗以見證聞撮厥綱領而吳爾富凜凜有生氣尤於貴壁低徊不置云且南冰洋於游巴西道中極之而北冰洋則於加納大北境近之述游歷英屬地加納大圖經餘紀

東衡里朝奉堂記

清 徐完樸 素園

神姓包安徽商人也於宋代革命時避元亂遷邑之東衡里設米肆取什一之利而家於湖遂爲湖人然輕利好義有古俠士之風值歲大饑道殣相望公慨

然以斗斛小進大出施濟貧民免死者八九而公之資本絕矣遂自殂里人憐其義葬於花山之朱家圩至今有崇阡焉乃葺其廟而歲祀之水旱祈禱歷著神異雖前邑乘失載但其裔孫尚有居安邑之蓮荷里者同治紀元慘遭兵燹廟像俱傾迨光緒七年里人章愚溪等鳩工庀材修葺社屋取租資以奉神伏臘之事經營伊始尅日告成知公之有以惠斯地者深且遠而人之所以思公德者真且摯也

新市鎮志序

明 陳 霆

州邑之志古列國之史也秦滅六國郡縣天下周官外史之制蕩廢而漢以來金匱石室之書惟王室有焉次而僭國僞朝雖或有作大概以爲偏方亂國之書後世徒取參考而已不盡憑也古者九州之志謂之九丘丘聚也言九州所有土地所生風氣所宜皆聚此書九丘亡而後歲時紀於荆楚風土述於周處方輿載於祝氏虞衡筆於石湖與夫名賢有錄花石有譜斯各具丘之一而外

史之遺意今志之大凡也仙潭舊無志予幼也喜從鄉先生長老訪求其故而覽觀其迹時所指示者某某坊某某第某山某遊某丘某藏某也名宦某也全節某寓某產某小子識之又曰市名新市陸市更徙也其曰仙潭謂昔爲仙人所游泳也小子識之旣壯而仕仕而歸則昔焉見聞了然心目之間而前所從受之人則故盡矣懼夫老而遺忘後將罔傳也爰輯而爲之志歲在丙寅桃月書成客或笑曰是庸豈知不爲覆瓿者哉夫仙潭郡邑之鄉鄙也今吳興則有志餘不則有志借其可書二編者何遽遺而棄置不登則無取者也子固叟叟焉又筆之而成書誣且贅矣予不能答則披卷謂所志者曰爾非湮鬱於百年而揚露於茲者乎爾非郡乘所略邑策所不載者乎爾姑謂宜傳曷默而不言爾誠無言世其奚謂然則又自笑曰夫辯者不信自信者不言爾其含冷煖於自知者哉世有我同心者知於覆瓿免矣乃序而刻之

仙潭後志序

明末 沈 陶 退齋

州萃而爲九邦分而爲萬於清邑而有新市彈丸黑子僻在魚巒然而四民之與處百貨之與集人煙浩繁文物蔚炳弗有述者將使風俗湮頹精華歇絕不其悲乎夫徵文立義是爲史法雜綠微言則謂志林胸不必擅三長跡不必乘四載彙爲一書要足成家顧乃無其才者憚無其志者愒無其時者悵安望考同訂異搜羅佚聞以備一方之掌故乎幸而三者皆有矣則又義存閱肆體尙簡嚴貪愛不忍斯刊除之難也氣遂彊直勢須遷就拘忌善畏斯揚厲之苦也幸而二者皆無矣乃上下百數十年搢紳好事家昔惟水南今則渚椒渚椒當甲申歲以隱疾假歸杜門却掃著述自娛間作仙潭志略雖取材胡氏仍者十三補者十七如履荒林密箐中刪其蕪疏其穢而嘉樹美箭森疏孤露娟娟乎清蔭之襲人也其記事賅而用心亦勤矣顧念曰屬筆終篇斷自何日嗚呼立乎哀定以指隱桓自孔子猶難之斯志也由唐以上若滅若沒由宋以來或存或亡遞及我明乍絕乍續卽才量不同大小各識後世有作要非傳接不爲功

所恨古人不見我焉知來日不如今哉抑余有懼焉社鼎自淪屋烏誰止得無今日民物之攘攘閭井之殷殷其交於吾目者曾不轉瞬而蕩爲冷風鞠爲茂草矣乎此亦事理之或然者不可以悟榮落之相尋盈虛之極致歟雖然昔淵明鑿空使千百世而下桃源鷄犬宛出人間嗟乎文之不可已也如是

仙潭後志自序

明末

沈戩穀

渚椒

且無論立言爲一不朽作史有三長余非其人豈有兀然一榻戶外之履闐然從何摩碑版詢故老可以網羅一鄉之井閭典實以存志林乎前讀水南先生仙潭志心向往之然望洋而歎深知莫能贊一辭也已得懷川翁續志遂考其與前志異同見其中人物事蹟爲吾有生或見或聞且其文平易近人效而爲之可免狗尾之誚因獨錄其與前異者附以近事則余竊筆焉但耳目竅啓入吾室者止兄子繩見聞頗與予同志若叔退畚足不出戶又蚤於予故坐見其寥寥也又性不能寒暄人率其意之所至雖寥寥數言亦多不堪示人之論僅

可存筭自備遺忘而已或曰盍亦出以示人可以廣文獻之不足訂傳聞之異辭予曰以示人則避忌周旋傷其直性者勢所必然也吾腕有鬼不能役管城君伺人間以爲顰笑吾甘吾窳啓而已事迄弘光紀年過此以往喪亂之後事頗繁絮然則柴桑書甲子之年歛歔未忍屬筆况譬之水焉未底於尾閭滔滔東逝者勢未有已也將以何日爲終篇之斷乎故甯闕之以俟後焉翁爲余婦之祖集中既表其行但老於學究續志不甚厭人意然垂至今日則猶見典型孔子曰史闕文馬借人吾猶及之則孔子所爲上下於古今之際者必非區區二事也神農虞夏不可得見故思其次與

仙潭後志跋

清沈汎

禹會諸侯於塗山防風氏後至今前溪古防風氏之國吳郡其地也禹貢未列於中原春秋始屬吳越浙之有菰苕也天下之一隅而清溪又菰苕之一隅潭又清溪之一隅也居民因陸市移此遂號潭爲新市而孰知新市之有潭謂之

爲仙人居也仙者何修靜陸真人也志曰真人東遷人目有重瞳掌有篆字背有斗文博精象緯及隱廬山與陶潛慧遠竺道生等十八人結社而真人與淵明最善後尸解間嘗出沒於潭上當時每聞絲竹之聲則知潭之始人跡罕少有龐古風讖曰借饒兵革亂如麻此地安然儘過得以方昔之桃花源亦差近焉地以仙著宜有異乎凡士者元亮記漁人之問津殆有意乎夫世治則賢人進用世亂則高人退避抑真人遭時喪亂與淵明同志雖身退守雌以爲學道之秘亦有得於易賢人隱之義歟迄今烟爨日繁竟成巨鎮與烏戍上下其間人物之盛財貨之聚通蘇杭之舟楫爲浙土之沃壤又非昔比而讖語亦驗焉吾里自水南先生作仙潭志紀晉以來下迨明初其至到山川寺觀橋梁科甲隱逸靡不確訂而縷記之甚有來鬼物之夜告者真可成信史生於茲土而不知其所自與朝菌蟪蛄何以異今嗣而續之者吾社渚椒先生也後先記錄功於茲土不小渚椒隱自明季閉戶著書面不見人出處真與柴桑合而所遇又

與水南先生殊故其所志每寓離憂幽憤之思潭在鎮之東有通仙橋設真人祠於潭之上橋之北舊有額有曰仙潭云系以詩曰匡山蓮社陸真人絲竹寒潭昔尚頻正是知音從此少空遺流水遶東澗

仙潭志餘序

清 陳尚古

潭於餘不鄉東北晉永嘉成市百餘年當宋元嘉太初之間陸修靜先生嘗隱居潭上世傳有丹光琴響之異而後人遂名爲仙潭厥後世運嬗人事更迭聞良多也然好學深思之士求其故而不得爲之撫掌太息感慨者數矣如是數百年有明家水南先生靈當武廟時做春秋書法考古覈今以志新市其旨正而嚴其文質而雅洵惇史也及歿而散軼者百餘年沈渚椒先生謏原名馘穀得諸民家闕疑訂譌以存一代典型先生追武陵志絕筆簪雲樓集是後字乙酉發前哲之幽媵作末流之砥柱豈微細哉然先生懷憂飲痛舉世無可與語或中夜悲來篝燈卒讀未嘗不廢書而涕洟也尚古少自郡歸先生已溘謝遺言緘度

兩麓周甲子而後發故莫能闕其書後十餘年從祖元堡修邑乘得闕兩先生仙潭志如球圖琬琰不忍釋手已而宗長後方携去且浹月矣尚古夢長者授一編曰此水南先生遺書也是日先子命圖水南像併貸二志錄之及捧歸渚椒像具在酷似夢中所見噫亦奇矣且尚古草茅布衣上不能列身巖廊任股肱耳目喉舌之寄次不能誦法先王衷道德渥仁義之澤下不能服勤耕稼攘除污萊以供朝夕水菽之養而先子見背獨爲匪躬矧昔賢徽型詎堪負荷然先子雅欲修輯不幸賫志以沒今方束經呼痛之餘追維水南前志採用胡拙訥舊文渚椒後志亦廣胡懷川不逮二翁愿而言確文雅雖儉網羅特周卒發兩先生之光夫千餘年風土人物升降上下泯泯焉若寒燐斷靄銷沉磨滅于墓林濠濮之中終無有牧人漁子過而問聞而太息者殆不可勝數微二翁亦大類此尚古非敢廁作者後要當述所見聞俟後之君子欲衷兩先生緒論庶得引拙訥懷川例意者稍有助焉故不辭猥陋竊摭志餘而書其簡端如此

康熙十三年歲在甲寅春三月望後四日棘人陳尚古序

新市鎮續志序

清 沈亦然

新市鎮之在縣特一隅而已縣有志矣鎮曷爲復有志乎蓋縣之志恆略况見聞所不及諮詢所未周則缺而不載者多矣鎮之爲地也藁爾生於斯游於斯者譬猶居家庭中門逕之曲折器具之成毀家人之甘苦勞逸莫不了然於心非如賓客暫至雖知之不能詳也此前志之所由作歟志終於明正德間至今已二百餘載中間胡君道傳潘君穀等雖各有紀載而均未成書惟戩穀沈先生作後志一帙程君之彭又輯仙潭文獻十卷然沈志成於暮年字句未經琢削程書則又失之太濫卽體例亦不無可議焉今去程時又百二十年能記載者絕少過此以往將欲求如周志之略并不可得矣於是姬子寅伯邱子文瀾陳子鍾英暨吾家鑣龍墀等亟請於予曰君日事著作而梓里之志闕如竊以爲不可予曰子亦知爲是書者有三難乎年世稍遠文獻無徵一難也前志作

於水南陳先生黃犬之皮不可以補狐裘二難也予居此日淺杜門絕遊墨墨若夜乃欲令求物於幽室之中非燭何見三難也必欲爲之則諸君當各網羅舊聞事必有徵地毋及遠或卽幽室之燭歟予雖蒙犬皮之誚不辭羣曰諾於是旁采沈程二書之可存者妄爲修飾又益以今時所搜採始明正德丙子以後終有清嘉慶辛未別爲續志八卷體例多遵前志而小變之草率蕝事遺漏知所不免姑存之以俟後之更定者

太平軍紀事

徐士駢
藻生

太平軍之入浙也始自江西安徽旋攻陷江蘇江甯與丹陽等縣分道進行陸路之軍西由甯國廣德至泗安南由獨松關餘杭襲破省垣又由安吉遞鋪埭頭自武康而下其時吾邑鄉團僅百餘人太平軍至永安橋約五六千人鄉勇勢不敵皆退走邑令何元輔〔麓耕〕亦避去邑遂失守是爲清咸豐十年庚申二月二十六日也旣入城凡縣署民房商舖質庫無不抄掠焚毀遇人或殺或

擄或與財物始放走自南門直街至假山街止皆成焦土並出掠四鄉至二十
八日仍從武康而去時張軍門玉良統兵入武林門復省城太平軍乃走餘杭
先是太平軍由長興襲湖郡爲親兵擊退守郡城者湖州知府瑞春歸
安令廖宗元候補道趙景賢四月軍由水
道襲蘇州至嘉興七八月間至石門長安并至塘棲新市新市雖較完而人民
被殺赴水者不少市廛亦被焚十一年辛酉二月省城兵至石門與太平軍接
仗五月太平軍由石門向唐棲新市出敢山溪而至菱湖等鎮謂之打先鋒時
守郡城者候補道趙景賢團統陸葵三率民勇會合擊破太平軍船百餘又進
至雙福漾斃軍千餘人軍乃潰退至九月二十一日復自杭州再至知縣鄧珩
遁遂據城沿鄉焚掠淫殺無所不至數日後始遣軍目安民建軍府於射圃前
設市肆於小南門外并設櫃開徵焉同治三年二月親兵自紹興渡江而下左
宗棠制軍蔣益澧方伯高連陞提督規復杭州太平軍聞風拔館縱火
竄走由洛舍至埭溪向安徽江西而去三月三日高連陞至民被迫而降者薙

髮復業然而生還者不過十之二三矣悲夫同年八月湖郡收復四年乙丑秋
秩序始定省垣且開科補行歷科鄉試兵燹之後虎口餘生流亡集而文風復
振亦時局之一大轉機也

按原作多諱忌依現行法令修正之有單用兵字者
此清代官兵也或僅一軍字即太平天國之軍也

北圩風災記

清 徐本衡 季賢

丙申孟夏之望天氣炎蒸翳雲忽起午後風雨交作傾注不絕邑之東南鄉徐
家莊左近有名北圩者是日申刻猝遇風災治城聞報後羣隨邑侯漢章張公
馳至該處惟見自公子廟起至北圩村長亘十餘里屋宇傾圮居民之斷脰折
臂或傷或斃者二百餘口誠近今之至大奇劫焉當風雨之初起也先於東南
角颯豎黑氣衝突層霄忽而西北河墩橋外之公子廟後灼有煙燄紅光自巖
穴噴騰而出其聲隆隆如數百輪舟鼓浪相逐霎時兩氣相薄天昏地暗河水
沸騰昏暗中恍有數百萬鳥雀盤舞觸之皆屋瓦也土人無知喧傳水龍與火

龍鬪又傳北山之麓素有極大蜈蚣蜷屈其中今觸龍腥奮而躍鬪道聽塗說殊無確據惟所奇者木葉焦如火烙樹上繫有五色草繩周絡村中凡草繩纏繞之處廬舍無獲瓦全古柏喬松大者數圍桑竹雜木小者拱把均被扭斷更有巨石重可二三百鈞風竟挾之而走屋內有石臼重踰百斤隨風飛墜於村外農船百餘號盡遭沈沒或懸擱樹上又有八歲童乘風遠御直至西鄉六十里外從空墮下村中浮屠各柩棺蓋與骸骨被風捲去而棺底獨存甚有數塚掩葬已久風摧塚崩尸骸零落惟賸敗絮殘衣委棄叢莽通計十餘里中斷埂頽垣一望無際惟村之中央有兄弟沈阿虎阿豹者其左右鄰俱傾倒彼獨片瓦不損或稱其先世好善以致此此一說也或稱丙子歲江浙有翦辮之謠謂是白蓮教試其妖術行旅艱危時北圩誤斃過客三人阿虎阿豹獨不與此又一說也但無論其事之虛實而該處風俗强悍素以藥魚牟利荼毒水族迭經勸諭積習難改豈天故甄其善惡以示懲勸歟因就衆所共見與天災之信而

有徵者以志其異且爲世之好善者勸焉

按此係清光緒二十二年之事極類地震距今未遠亦信而有徵者錄之以供天文家之研討焉其善後振卹之事甚關重要自應兼載於治行志張縉雲傳內詳之

植棠記

程 森

德清之爲邑也繁疲難民國肇造百事更張非有賢令尹不足以裕舉措四年夏吳公來吾邑下車之始待理孔殷如增學校興實業培險塘修縣志皆吾民所切望而不得者公乃擴之成之烟土盜賊吾民所痛惡而未絕者公乃禁之弭之而不遺餘力此有形之政績昭昭在人者也而無形之感化實因懲勸得宜故能四境安謐聞於上而懷於下六年十二月內務部嘉公之能會同司法部獎棠蔭章越一月省長齊又呈奉明令獎六等嘉禾章復於另案內超給三等嘉禾章夫豈偶然所能致哉四年迄今旱潦不災秋成有慶嘉禾非虛也甘棠一篇周人思召伯之德而愛其樹國家乃制棠蔭章以示信賞彰有功焉邑令之得棠蔭章者始自公因樹棠於大堂左右以爲公憩說之紀念公殆吾邑

之召伯乎願吾人勿翦勿伐三復不忘無待懲勸而進於善則後之觀感不更有深長之思乎公名騫皋字鶴巢河南固始人曾祖其泰清道光九年以名御史簡湖州太守邑受其賜旋調杭州清史有傳後先繼美矣中華民國七年三月日記

德清縣光復記

程鳳鳴

辛亥革命何謂耶曰脫離專制肇造共和解除君權變易政體屋清社以樹民國成於辛亥歲也厥事鉅而應有所記殆無逾于此者然其本末沿革乃史家之事非余所敢聞也茲就地方之變革秉所知者略述之粵自武昌起義全國景從不兩月間先後反正名曰光復光復者光華復旦之義焉而能兵不血刃民不騷用告厥成爲亙古所未有以視嘉定十日揚州全屠其相去何其遠耶清邑之於斯役也由夙懷革命之士發揚民族精神先未雨而綢繆俟水至而渠集奔呼策畫不乏其人憶史令久鏖有呈復浙江都督一文其略曰

案奉

都督支電開據臨時稽勳局浙江省調查會會長俞煒呈稱前奉

臨時稽勳局長馮歌飭將革命功勳成績於電到三個月內調查完竣全數報告等因奉經通告務於十月內將應報各種勳績送會彙辦在案現因尚未送齊擬請令催限於民國二年一月十五日以前送會彙辦等情除通電外仰該知事等即便轉行遵照具報等因奉查屬邑士民前在清兵固守南京攻克奏凱案內有出力人員陸軍第二十一團第一營退伍兵士譚錦有一人業經奉獎二等年金在案惟德邑夙具革命奔走籌畫光復全縣者自不乏人節經派員調查均以當時在事人員不願居功致稽呈報茲據調查員報告去歲德邑光復時先由程森蔡煥文徐師善聞毓璇戴文輝蔡振鏞程鳳鳴蔡景謨許德輝徐沛善徐滋善等聯合尙武會諸同志組織團體曰光復會先由程森自滬湖密就機宜往返承商與

徐師善等連日會議組織一切公推蔡煥文爲民事長於九月十九日宣示光復召集邑民大會以告厥成當夜刊就告示派由戴文輝程鳳鳴蔡振鏞徐滋善賈赴鎮鄉與各自治會接洽開會演說勸令易幟卽毀龍旗懸白旗以爲拔趙樹漢之標識所赴一鎮十一鄉共表歡迎如響斯應然亦不無莠民反對光復徧造謠言揭貼聲稱實行抵抗不成則肆放火搶劫闔邑驚皇秩序擾亂乃推前赴鎮鄉之戴文輝等星夜赴杭請兵援救聞毓璇蔡景謨分赴杭滬購辦槍械後以勢值危緊由戴文輝等往返杭滬會同聞毓璇蔡景謨星夜購到槍彈回德分給各固有民團加意防護與耆老徐士駿許德修沈光裕等會商公推嵇炳元爲民團局長炳元初在豫候補因同籍省親耆老懇留至其經歷並見薦辟適狄前知事紹青奉檄到任連日會議公決加聘嵇炳元總辦民團募集壯丁日夜訓練因認真任事而人心始定一面嚴拏土匪呈准上峯執法以繩而盜賊始斂跡並經籌集款項鎮撫難民獎

勸各民團一律協防以保桑梓然後次第建設秩序恢復卒能七邑無驚地方安謐凡此諸人核與臨時稽勳局暫訂賞卹章程草案總綱第四條之規定似無不合等情報告前來知事詳核無異理合備文呈報仰祈都督核示飭遵

是案既上聞都督朱瑞照例註冊並轉臨時稽勳局存案無異惟斯役鳳鳴旣參末議效奔走覺當時情況有爲前呈所未盡者查德清光復先與武康各同志結合故易幟後先一轍均由先君森秉滬湖密令以行之者其動機猶在杭州光復之先武康係另案辦理故前呈未及也至新市全鎮之光復僅次邑城一日當余等之奔赴也新市已屆開會矣先是新市沈汝楷高振垣鍾選青胡錫申胡家驥及程源等得先君森密簡有奉令復邑不日舉事城鎮唇齒誼切同舟攻守聯盟諸祈見教鎮多君子諒能慎密等詞至是乃由沈君等偕同高士鈞劉曾墉鍾光熺劉衍慶黃冕英嚴元英潘寶瑩鍾守恆胡若龍等暨闔鎮

民商集會商議高揭漢幟表示反正惟公選主鎮事者未決結果羣屬意沈汝楷而汝楷謝辭乃加推余造訪其廬乘客談之頃由士鈞曾壩等四人代表衆意以擁之其事竟遂此則躬與者焉敢爲鎮人慶也至在各鄉多由自治會主持其事能與當地人民同趨一致乃能共觀厥成嗟乎周餘黎民靡有子遺漢家約法人士騰歡率豪傑以返河山仰卿雲而歌復旦此誠萬衆一心者也豈僅一邑而已哉

按部頒修志事例概要定地方志須撰大事記新志於此應廣載之然紀光復非細故也本宜由原纂四君撰述之以適凡例乃原作無此而編纂今星散葉生徐公且已歸道山爰基二十前之經歷之回憶以補充之抑查原呈當時在事之人多屬不願居名今豈故違其願而且侈談先德耶因部令所在不敢隱耳

讀音講習記

程鳳鳴

研究讀音爲國語統一之預備也國語統一爲言文一致之預備也中國文字最古語意艱深能文之士多以意會非以法傳能者愈能不能者之無莫識於是文語相離方言龐雜一省一區之內幾成鄰國相望若論幽燕閩粵無異地

北天南甲午之戰以還憂國之士感覺改良文字爲推行教育之要圖乃有王小航勞玉初吳稚暉諸老殫精竭慮創造拼音字母前清學部曾開中央會議決定國語統一問題民國以來多數學者鑒於改良文字必先統一國語統一國語必先統一讀音爰於元年開讀音統一會議定注音字母三十有九以代反切之用並加研究以備頒行四年由部設立注音字母傳習所七年由各省高等師範學校附設國語講習科同年冬由部公布注音字母三十九字旋又增加一字合計爲四十

後改稱國音注音符號即今所通行者

八年印行國音字典並設國語統一籌備會凡此經程具費心機公布施行尤主審慎蓋當時主由舊學而翻新免爲識者所譏也博稽歷史詳加探索以期推行無阻若夫以之教人者尤須先備各項資格一曰通音韻二曰通小學三曰通一種以上之外國文字四曰諳多方語言始稱合例即以研究讀音而論非特不宜脫離漢字尤須熟諳辭典語法及各種語體文免有應聲而不識字之誚誠其難其慎抑又不容不習者

也時余佐縣署視學乃承命諮商勸學所蔡所長暨注意國音學者自具資斧躬赴省垣就學歸將以謀應用也惟應用之義有二一為本身執業計二為傳授他人計余既資格未具而又羈於職守不足語以授人又不得不為授人之謀乃由縣公署偕勸學所再度舉行讀音講習會分延許君麟孫范君洽民擔任講席集全縣教師以為學員授畢讀音應有大單元其間有無成績可述能否喚起社會同情非余等所敢知也惟教科書既改用語體而習用字又加以注音則百年樹人日積月累願後之來者將以踵行其事也爰記其略并以表系之

國音注音符號

ㄊ	希	ㄐ	知	ㄑ	痴	ㄒ	詩	ㄓ	日	ㄔ	資	ㄕ	雌	ㄖ	思	ㄗ	伯	ㄘ	迫	ㄙ	墨	ㄜ	佛	ㄝ	窩	ㄞ	德	ㄟ	特	ㄠ	訥	ㄡ	尼	ㄢ	額	ㄣ	蘇音	ㄤ	赫	ㄥ	基	ㄨ	欺	ㄩ	尼	ㄩ	蘇音
---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	---	----	---	---	---	---	---	---	---	---	---	----

ㄩ	以上母聲	一	衣	ㄩ	橫行作一	ㄩ	烏	ㄩ	迂	ㄩ	啊	ㄩ	痾	ㄩ	寧晉	ㄩ	鵝
ㄐ	哀	ㄑ	呢衣	ㄒ	熬	ㄓ	歐	ㄔ	安	ㄕ	恩	ㄖ	昂	ㄗ	腰		
ㄌ	兒	ㄍ	因	ㄎ	央	ㄌ	英	ㄎ	蛙	ㄎ	窩	ㄎ	歪				
ㄌ	蘇音	ㄍ	溫	ㄎ	注	ㄌ	翁	ㄎ	翁	ㄎ	蘇音	ㄎ	淵				
ㄌ	幽	ㄍ	烟	ㄎ	央	ㄌ	英	ㄎ	蛙	ㄎ	窩	ㄎ	歪				
ㄌ	威	ㄍ	灣	ㄎ	注	ㄌ	翁	ㄎ	翁	ㄎ	蘇音	ㄎ	淵				
ㄌ	氣	ㄍ	雅	ㄎ	注	ㄌ	翁	ㄎ	翁	ㄎ	蘇音	ㄎ	淵				

此編有關文化又繫凡例爰補列之藉備參考

論議

大璫張瑜科參 并跋

明 陳 霆 水南人

竊張瑜劉文泰高廷和三人黨惡著於朝廷罪狀白於天下會審於朝真情既得共棄於市公法安逃而乃巧遮百端誑辨四出謂交結之情為不然謂比附之律為未當希圖倖開生路苟追死刑痛惟先帝之疾始因起於感冒初未淪

於膏肓使張瑜公選名醫亦豈必遽罹大故而乃懷私自用引類市恩徒報二人之殷勤罔顧萬乘之危殆今日之事致先帝升遐者劉文泰高廷和用藥之咎致高劉進用者張瑜汲引之功論罪必坐所由張瑜則係首謀誅惡必先黨與劉文泰高廷和豈容末減再照張瑜自稱奉旨督同豈屬懷奸交結夫城社失固故狐鼠得以依憑藤蘿善緣由喬木巧於接引高劉素係庸醫其盤踞南城實藉張瑜左右而內爲之地張瑜素昧醫術其專主御藥亦藉高劉彌縫而外爲之援中間雖有先帝督同之旨意其實出自張瑜朦朧之奏請至夫承領召醫之命乃獨薦引同事之人由其締交有年以致纏綿無間內外相濟彼此扶同豈得謂非夤緣顧欲解乎交結事至於此口尙何辭爲張瑜者自宜伏聽斧鉞之誅用泄臣民之憤而猶以母氏爲言悲戀不已天恩上請煩瀆有加且張瑜一奸惡之徒尙託篤子之愛而舉朝抱忠孝之節豈獨後君臣之倫穆穆在上明明在朝何忍忘君父之讎甘於向惡逆之黨劉文泰高廷和罪無二等

事干一連觀其屢同奏陳顯其互相要約在古有云南山可移判不可改宜從原擬謹奏自跋曰弘治己丑四月二十七日孝廟以歲旱於齋宮沐浴焚香露天爲蒼生請雨是日忽冒風次日不豫大璫張瑜者陝西人主御藥素與太醫院判劉文泰御醫高廷和締結二人者素昧醫術而急於進用時瑜得旨召醫將謂上疾易理二人者可以已力引用效且均獲賞乃盡廢院中諸醫獨舉二人進外廷知不可然瑜意莫違也旣而投劑謬誤聖疾轉劇不七日晏駕中外痛憤奏下三人獄朝議謂其交結近侍朦朧進用皆論斬是歲秋後行刑三人者俱赴市矣而瑜與劉瑾鄉里且索相黨遂遣家人擊鼓聲屈瑾傳旨取三人還仍繫於獄公論大不平予時備官刑科與同僚湯仁夫禮敬輩上章論執不聽明年瑜等賂瑾求脫瑾旣私諾無可藉手則嗾其申辨屢下法司看詳輒爲予輩論駁如是者不下十餘次最後予卽筆參如云旣上法司不復可措手乃具奏欲從原擬瑾以瑜等不得脫怒詰其故衆遂駕言刑科欲殺內官自是

視科道官若冰炭矣丙寅冬瑾下予於獄杖三十棍其餘仁夫輩相繼逐出既又逐閔少保張都憲楊大理已乃傳旨瑜三人免死出獄此蓋大詫異事也嗟乎許世子以不嘗藥春秋書爲弒君今此三人者非直不嘗藥之比而竟爾縱賊逆瑾之無君豈特末年已哉

仙潭後志

布衣蒙賜詔書并銀絹椒藥謝表

附記

明王升

伏以聖明御極自慚無補於涓埃詔命臨門忽沐分霑於雨露輝生蓬華歡動鄉閭臣誠惶誠恐稽首頓首欽惟皇帝陛下德厚道高功崇業廣智勇天錫聖敬日躋任賢使能與堯舜之心同大賞功罰罪如天地之德無私身處九重之中明照萬里之外伏念臣性資愚陋學術迂疎分甘老於山林名敢求於簪紱教子乏義方之訓承恩忝科甲之榮大邑分符深佩選掄之重安書寄任勉加忠孝之全俾恪守於廉勤庶少酌於知遇何冀上聞於天闕過承下逮於星輶白金光照於琴書黃絹春生於筐篚芳椒助養上藥扶衰豈期衰朽之餘遽拜

駢蕃之賜征徭特免喜懼交臻臣瞻仰清光鈞陶聖化心同犬馬願摠報効之誠景迫桑榆欣覩太平之盛謹奉表稱謝以聞無任瞻天仰聖激切屏營之至臣誠惶誠恐稽首頓首謹言

附

正德乙亥歲予擬作誌升之曾孫義字宜之者庠生也以書介其家世來囑爲纂述是歲予偶病中輟越明年丙子六月間始復屬筆宜之一夕夢一老者謂曰修誌豈小事遺此二句可乎宜速補之促甚急宜之寤而漫不能省少頃復夢如前心竊異之明日偶造予之東隣遇一客退自予所因叩予所爲答以方修仙潭誌宜之矍然驚亟款予於渚山堂值予晚沐留草於几案間宜之閱至前表其中果遺俾恪守於廉勤庶少酌於知遇二句卽泚筆補之頃之予出沐與相對宜之爲言如此咄咄真怪事哉始予以仙潭一名鎮前修往蹟無能紀述者恐自後益湮故雅意作誌然惟宜之從與以一書次則朱君文正胡君藻助予搜訪此外號稱衣冠詩禮者或叩其家世率間

漫應之甚有不相答者不謂區區之誠乃獨能感通幽冥之間也是歲七夕

後二日記

新市鎮志

按前跋係陳靈所撰鎮志靈所編也又詔書載諭敕編內至詔書內所稱王軫之父家書侯志藝文志內曾載一簡曰付男軫家書即指此也

掌湖廣道監察御史以杭湖棚民墾種山場有關水利等奏疏

清 蔡賡颺 芸士邑人

竊照浙江杭湖兩屬素稱沃壤全恃山水之利東西兩天目山爲苕水所發源東天目之水經臨安餘杭德清諸縣入太湖其上流以餘杭之南湖爲停蓄西天目之水由孝豐經安吉長興等縣亦入於太湖旱則資其灌溉潦則藉以宣洩利甚溥也自嘉慶年間有溫處等府無業游民前來租種山場栽蒔花生薯蕷等物土人利其租重不行禁止其山自開墾之後不長柴薪盡成鬆土一遇大雨山水漲發沙隨水下河道就淤斷港支流大半壅塞近聞各縣棚民愈聚愈多而臨安餘杭等處尤甚山場開墾幾遍土盡鬆浮以致上游停蓄之南湖

日形淤淺黃梅盛漲之時苕溪急溜驟難宣洩遂泛溢於民田年來屢被水災未必不由於此且此等游民皆非安分之徒臣於道光八九年間在籍時稔知棚民犯竊案者不一而足比年風聞各處更有搶劫之案其爲害於民間實非淺鮮相應請旨敕下浙江巡撫轉飭杭湖兩屬地方現在棚民或責令回籍或編入民牌應作何查禁之處妥爲辦理其已開墾之山嚴禁土人毋得再行租出庶數年之後山場可復舊觀而河道亦不至再淤矣奉旨著浙江巡撫飭縣查禁又爲州縣虧空過多總由積弊遂上奏曰州縣一官必須精明幹練方能振作有爲若夫闖茸之員性耽安逸公事漫不經心倉庫正項一任官親門丁涉手於是胥吏得通同舞弊此其致虧者一也又有紈袴出身習尚奢華在京需次任意揮霍逋負纍纍迨經部選到任又復不知撙節挪移官項償抵私虧此其致虧者二也更有不肖佐貳貪鄙居心該上司或因年家故舊徇私情或因有奔走微勞目爲出色一旦州縣缺出委令署事遂其所欲於是肆吞公

項捏作虧空以貽累後任此其致虧者三也州縣交代本應徹底盤查秉公核算查出虧空復輾轉遲延不肯分釐交出僅立空頭借券搪塞一時甚至將無用什物昂價作抵接任人員或礙於同官情面或因此缺升調容易尙可有爲限期已迫含忍結報清交其實公項仍歸無着此其致虧者四也凡此諸弊少則盈千多則累萬一經虧短彌補維艱往往藉其家資不足抵數監追數載無款可償不得已或令通省攤賠或令後任分年籌補遂至緊要之正項變爲寬緩之攤捐矣相應請旨敕下各直省督撫嚴飭所屬州縣務須奮發精神潔清自矢屏奢華而崇節儉重帑項而去貪心交代一秉至公結報務期確實并責成該管道府不時稽察如有前項積弊立即嚴參懲辦庶劣員咸知儆惕而庫項不至虛懸矣奉上諭通行各直省又上販米出城向無治罪專條定案時無例可援不免畸輕畸重遂上奏請定罪名後經刑部議准纂入新例

孔忠移祀崇聖祠議

清俞樾

謹按家語孔忠字子葭孔子弟子蓋卽孟皮之子也今從祀大成殿東廡其位在狄黑之下公西廡之上說苑載孔子弟子有孔葭者與宓子賤同仕孔葭卽孔忠也其賢固不若子賤然旣爲孔子弟子則子思子之從伯叔父也子思爲四配之一祭於殿上而孔忠祭於廡揆之倫理有未順焉伏思顏路曾皙並孔子弟子宜從大成殿兩廡而今入崇聖祠者避其子顏子曾子也孔忠於子思固非父子然而禮曰兄弟之子猶子也竊謂孔忠宜移祀崇聖祠以安子思之神樾於咸豐六年奏請以孟皮配享崇聖祠而未見及此因著其說俟後之君子焉

子焉
寶萌集

文廟祀典議

清俞樾

咸豐六年樾在河南學政任奏請援蘧瑗之例以鄭公孫僑從文廟兩廡又請以孔子兄孟皮配享崇聖祠詔下禮部議皆如所請樾旋以人言去職跼伏草野又經兵亂流離奔走靡有定居然念文廟祀典尙有宜增益者樾故官學政

俎豆之事固所職也茲雖放棄敢默爾而息乎謹私議之如左

一曰今所傳毛詩故訓傳者大毛公亨所爲也謹按陸德明經典釋文序錄曰毛詩者出自毛公徐整云子夏授高行子高行子授薛倉子薛倉子授帛妙子帛妙子授河間人大毛公一云子夏傳曾申申傳魏人李克克傳魯人孟仲子孟仲子傳根牟子根牟子傳趙人孫卿子孫卿子傳魯人大毛公是大毛公之詩其原出於子夏鄭康成本之而爲箋孔穎達因之而爲正義至今學者誦習謂之毛詩齊魯韓三家之詩皆不傳而毛詩獨行昔唐貞觀二十一年詔以左邱明卜子夏等二十二人代用其書悉於國胄自今有事大學並令配享若大毛公之故訓傳非所謂代用其書者歟徐堅初學記載大毛公之名曰亨是較高行子之徒傳其氏而不傳其名者其迹之顯晦有殊矣乃文廟從祀有小毛公萇而無大毛公亨禮曰三王之祭用也先河而後海或原也或委也此之謂務本今祭小毛公而不及大毛公無乃飲其委而忘其原歟非先河後海之誼

也是宜增入者一

一曰義理存乎訓詁訓詁存乎文字無文字是無訓詁也無訓詁是無義理也然則文字所繫顧不重歟漢大尉南閣祭酒許慎生東漢中葉去古稍遠俗儒或詭更正文以耀於世慎學於賈逵從受古學著說文解字十四篇五百四十四部九千三百五十三文叙篆文合以古籀斯學者得以考見六書之原因文字而通訓詁因訓詁而明義理厥功甚巨其稱易孟氏書孔氏詩毛氏禮周官春秋左氏論語孝經皆古文也凡古文舊說敝失無傳者賴其書猶存什一鄭康成注禮嘗徵引及之鄭之於許年代未遠而其書已爲鄭所刺取慎又著孝經孔氏說及五經異義是其貫通經學著述非一而說文解字一書尤爲言小學者所宗士生文日而欲因文見道舍是奚由哉伏念今代同文之治超踰前代家有許氏之書人習說文之學而春秋有事文廟不得與配享之例無乃闕歟是宜增入者二

擬請陳僉事崇祀狀

明 沈 陶

蓋聞宅家惇典爰列宗伯之司里俗觀風更採庶人之議故芳流于結蒞百喙
斯鳴斯禮盛于傳葩六祀肇舉必循聲而課實將勸善而懼淫故宦陳霆仕學
俱優窮達無變松孤于藜莽之塊鶴炯于雞鷲之羣孝自性成學由天授植老
謀于天器披夙慧以清裁口織舌耕菽水蚤迎愛日筆力墨介羽毛遠致凌雲
蕭蕭韋孺之經煌煌董相之策堂敬皇之末祀在康陵之初年此日題名是投
軀于華省何人封事且碎首於赤墀花隱掖垣肯結寒蟬之唱血殷殿檻遂斥
伏馬之嘶偃息六安杖與三十樓遲兩載路謝八千黯黯銀鐺舊染羈孤之淚
淒淒玉玦初蒙朋黨之書奇服好湘北騷翁緩帶加江東遷客陶潛彭澤風流
許以無雙朱邑桐鄉治狀推爲第一會帝奪兇闈之魄鬼害其盈惟天牖聖明
之衷王赫斯怒伏歐刀于都市賜環佩于遠臣爰自刑曹遂遷憲臬人知吾直
敢營宦于四時上許其忠俾文衡于多士頃因無識從蜀雪而吠聲小或有言

就茗花以通夢鑿池引水輦石成山可逸可仙揖用泉而我輩半村半郭謝冠
冕于時流叩鯽橋前釣筍每下嘯猿峯外蠻榼長攜看屋梁而著書罵朱公惟
賈豎坐野航以酌字笑楊子以盜儒名利頓忘已見紫芝眉宇晤歌詢樂不問
白虎威儀且門望旣崇還踰荀氏乃庭趨有翼未數顏家克振其先紹陶莊之
吟緒用啓厥後抗鄭衆之經傳是知生脊而死尻當復途歌以巷祝爾德無斃
樹石闕于口中其羽可儀謁雲階于足下勞思遺範勉接前修玉塵金鵝掇英
光于山水南箕北尾表正氣于星辰論旣侈于陽秋祀宜公于月旦侑素王之
俎縮酒席間陪羣哲之祠觀禮廡下激揚實昭代之盛獎勵詎同邑之私

仙潭
後志

與吳和甫

存義

清 俞 樾

曲園

辱手書知輶軒所至以經術倡導後進因定海諸生黃以周解考工記世室與
樾說合遂詢所自來而得其先德薇香先生明堂步筵說一篇錄寄甚善樾受
而讀之其據宇文愷傳證記文是堂修七非堂修二七洵與樾合惟解廣四修

一及三四步四三尺似皆不及鄙見之塙且如其說夏后氏堂室全基廣如干步究未明白說周制較明白矣然記文明言五室凡室二筵乃謂止說四隅之室義亦未安老前輩以爲何如此外各種想必流覽一周未知都若干卷卷若干言定海海外一島耳乃有此通經之士殊不易得宜老前輩惓惓欲刻其書也李少翁重刻段說文亦未成功不知其能料理及此否竊謂薇香先生之書如果卓卓可傳可後先爲設法令其子孫先寫副本寄存尊處將來或集貲刊刻或假鉛字版排印似較僻在海外易爲力也其論語案聞有印本能覓寄尤

感
曲園
書讀

與戴子高^望

四月十一日接正月二日書知起居佳勝慰甚居停主人周君季貺好尙風雅洵冠蓋中不可多得者相與賞奇折疑亦天涯之一樂也承示以爲拙著各書宜隨作隨刊此固見愛之雅意然其事何可易言僕羣經平議中易詩書論語

德清縣新志

卷十一
藝文

三十

孟子如千卷在前兩年視之似乎既竭吾才矣今更讀之又頗有未安者然則僕近年所著春秋三傳外傳及周禮儀禮諸經平議數年後安知不自見其闕失乎學問無窮蓋棺乃定必欲毫髮無憾誠恐畢生無此一日然見在諸經尙未卒業或者因此及彼尙可隨時增益且俟全書成後再刊以問世未晚也僕所著書已不少若皆成就或不下百卷刻貲亦正不易耳此道衰息已非一日輦下諸老先生庸庸者姑勿論矣其高者亦不過拾宋人之唾餘貌爲理學而已七十子之緒言兩漢經師之家法其有聞焉者乎僕學術淺薄又不得位豈足以振起之乎足下年少氣盛力足有爲斯文未喪勉之而已

又與子高

松泉舍姪來交到手書知爲學日益又知近來得力於老子之學以此治心以此處世甚善甚善老子書每言唯其如此故能如此極是利害世但言其和光同塵非知老子者也論語解六十三事極有發明僕自都門旋津仍事譔述藉

以銷夏所著羣經平議三禮三傳楠有成書似乎所見較埒其易書詩諸經皆數年前見解不逮多矣今年諸經卒業後尚須通覽一周方可出以問世耳來書辱有親炙學者之稱不敢當不敢當僕爲學楠略不足爲足下友若足下真吾畏友也數十年來吾道衰息甚矣無往不復必有起而張之者足下勉之僕則無能爲矣

又與子高

自去年九月朔得惠書後久不得書未知今年究館何處念之念之僕杜門養拙仍以撰述自娛經訓弼教中又增公羊穀梁各一卷國語二卷周禮二卷見在從事儀禮未卒業也承索觀論語平義但此書二卷寫錄一通亦頗不易且其中尚多未定之處故不克寄奉約計一二年間此書必可告成大都周易二卷尚書四卷周書一卷毛詩四卷儀禮二卷周禮二卷大戴記二卷小戴記四卷公羊一卷穀梁一卷左氏傳三卷外傳國語二卷論語二卷孟子二卷爾雅

二卷序目一卷此其大略矣書成後卽當付之棗梨以質海內諸君子此外尚有羣書訂義一種未定如千卷僕所撰述此二種最大矣餘若字義載疑等書卷帙無多隨時寫定尚易爲力區區之意五十以前此數種書均當刊定此後天假之年未卽委化或精力尚強不妨續有所著否則涵養性眞爲道日損矣足下欲治儀禮孔氏鬯軒有廟寢異制圖其寢制一圖姑置勿論其廟制一圖可據以治禮矣且其所說亦頗簡明其謂棟後爲室棟前爲堂雖所據士喪禮注未免誤會鄭意然古制實是如此僕治禮竟亦當爲宮室考一卷他日南中肅清得歸臥鄉山擬于南埭舊居改造先祠卽依古制爲之計所費亦不多未知能如吾願否書此以博一笑

與應敏齋

寶時

承示龍門書院章程已細閱一過學術粗疏無所獻替惟有一事特其小小者于私心竊有所疑按課程第五條每月朔望師長西南面立諸生以次東北面

揖師長答揖此師弟子之位未知所據何典古之君子席不正不坐推之於立何獨不然今朔望相見師弟子各據一隅此何義也考古師弟子之位經無明文惟大戴記載師尚父進丹書武王東面立師尚父西面道丹書之言禮記學記正義引皇氏之說以此爲王廷之位若尋常師徒之教則師東面弟子西面與此異也執是以言師弟子宜東西相鄉矣然東西相鄉或疑非所以尊師戰國燕策載郭隗之言曰詘指而事之北面而受學是古禮弟子北面漢書鄭康成傳汝南應劭自贊曰故太山太守應中遠北面稱弟子是漢時弟子亦北面今若用皇氏說師長東面又依古禮弟子北面較之各據一隅或少勝乎夫一揖之位其時甚暫其故亦甚微然閣下勅立此書院四方學者將于是乎觀禮禮得則無思不服禮失則退有後言觀瞻所繫不可不慎乞與訪翁更詳之

續書

曲園

又與敏齋

德清縣新志

卷十一
藝文

三十一

夏小正一書唐以前自有專行本不僅附見于大戴記也宋傅松卿得其外兄關澹所藏小正卽隋唐以來相承單行之舊本與大戴本頗有異同足資稽考是傅氏于此書不爲無功滬上諸君子請照前温州府教授金衍宗詳定章程入祀經師祠自爲允當孝經在秦時爲河間顏芝所藏漢初其子貞出之凡一十八章是爲今文而其後又有古文孝經出自孔氏屋壁凡二十二章安國爲之作傳然唐開元時國子博士司馬貞疑古文閨門章文記凡鄙又譏孔傳淺僞是古文孝經眞僞難明言孝經者當以今文爲正明皇據以作注宋邢昺據以作疏迄今列于學官士林誦習皆今文也顏氏之功洵不小矣至劉向鄭衆盧植服虔唐貞觀時從祀孔子廟廷明嘉靖時始罷顧氏日知錄深以爲非諸君子請以顏芝並祀經師祠自是公論閣下宜從其請以報先儒抱殘守闕之功若夫孔叢子則僞書也雖託名孔鮒而漢志初不著錄近孔奭軒氏疑是孔子二十二代孫名猛者僞造猛從王肅學承肅意而爲之然則孔叢子一書雖

孔氏之裔亦未能篤信矣至孔壁之書初不知爲何人所藏無從塙證其爲孔鮒且未敢因其爲孔子九世孫稍從遷就也滬人請以孔鮒祀經師祠似可無庸置議辱承垂問故縷縷言之閣下以爲何如而樾更有請焉經師之祀所尤不可緩者莫如大毛公今文廟從祀有小毛公萇而無大毛公亨揆之先河後海之義不其闕如未識彼都人士已議及否

曲園書牘

又與子高

春來三接手書而不一答非懶也自正月二十一日至滬二月十三日還蘇以至於今無須臾之暇計此四十日中止於舟中讀列子一過而已其碌碌可想故不暇作書也羣經平議已刻成倘有誤字須寄杭州改正諸子平議亦擬集貲刻於吳市未知果否都下方大開同文之館招致西賢使海內士大夫摳衣受業而吾儕乃窮年兀兀抱遺經而究終始啞其笑也想足下助我撫掌也曰本土人僕於上海亦見其一然不足談蓋非足下所見者近得彼國人安井仲

平管子纂話足下亦得之否其書似不及物君之論語徵然僕實未及細讀惟記其訂正戒篇之里官爲釐宮二字之誤頗自有見又時引古本僕未嘗詳校未知與今本孰勝也管子在諸子中爲最古然實是雜家言僕於諸子獨喜墨子其言切實有用而文亦反覆詳明漢人以孔墨並稱想尼山外斷推此老矣莊子書僕不甚解亦不甚喜要其大旨不過能外生死而已其精義微言尙不及列子卽以文論莊子雖汪洋自恣然不如列子之曲盡事理也此僕之偏見不足爲外人道者

曲園書牘

上阮云臺師書

清

許宗彥

周生

伏讀浙江圖考據班志以釋禹貢精確不刊自來紛如聚訟解經則依文傳義志地則徇俗立名皆闇於形勢變遷以今測古強爲之說耳惟圖考中所云南江故道似在漢時卽已湮塞歷考史傳三國東晉六朝其間兵事凡自吳至會自會至吳必曰渡浙江從未有以舟師入東中者唐末安仁義以舟師至湖州

欲渡江云云史特彙括其詞非謂舟師自湖州徑達柳浦也論衡書虛篇云吳越時分會稽郡越治山陰吳都今吳餘暨以南屬越錢唐以北屬吳錢唐之江兩國界也仲任蓋據其時所見言之是仲任已不知有分江水道矣漢順帝永建中分會稽郡以浙江西爲吳以東爲會稽後世言浙東浙西實始於此其所分之縣亦據今錢唐江爲界求之漢末江至餘姚入海之道絕無可據則湮廢久矣似不待唐時築海塘而其流始絕也水經注引錢塘記有防海大隄三國時所築元和郡縣志謂史記言秦始皇至錢塘是海塘亦自昔有之矣川流遷改千餘年以前故蹟不復可見而禹貢三江則證之內外傳吳越春秋越絕等書斷以班志所說爲定宗彥禱昧之見嘗疑分江水爲南江所分非其正流說具別紙就正謹此奉達

鑑止水齋

諭敕

勅永靈廟神封顯佑侯

德清縣新志

卷十一
藝文

三十四

勅湖州府德清縣新市鎮永靈廟土地保寧將軍維神之靈覆護一方曰雨曰

暘隨禱而獲肆加顯號用答殊休永佑我民歆於世世宜特封顯佑侯

紹興九年五月

日

又加封號並神妻協惠夫人

勅湖州府德清縣新市鎮永靈廟顯佑侯朕自卽位以來修崇祀典凡有功德於民者賜號加爵惟恐其後况爾神廟食此方曰雨曰暘隨禱輒應部使者順民之請以狀來上茲用申加二字以烜赫厥靈其益彰顯惠民亦永永丕享可特封顯佑通應侯

勅湖州府德清縣新市鎮永靈廟顯佑侯妻幽明之理一也婦人無爵從夫之爵今爾神旣已進爵爲侯申加顯號則於厥配豈可闕無褒寵茲用并錫嘉名

封以小君尚其陰相茲侯廟食可特封協惠夫人

慶元二年八月日

又晉封號

勅安吉州新市鎮永靈廟顯佑通應侯朕操慶賞之權以爵有功其於神猶人也爾以晉永嘉之大將逮周廣順以啓封垂庇一方血食自古旱乾有禱響答如應比歲以來靈異尤著蝗孽隨風以入水寇巢託夢以指迷旣功狀之上聞豈寵章之可緩封增二字庸侈神休加惠我民俾世世享可特封顯佑通應惠利侯

端平三年
十二月日

封沈約爲吳興地主制

制曰朕賴天地社稷之靈立天下萬世之法今年六月初三朕祇行天下俱准舊規應載祀典階贈榮褒勛得故臣沈約周公署府實爲賢良撰四聲韻譜制宋晉書二萬卷卒謚隱侯從祀聖廟爾靈顯揚具沙場殺敵之功眞護國保民之弼特封光祿大夫資福侯鼎建廟祀爲吳興地主歲令有司致祭給俸二十石俾爾子孫世代并免雜泛等役永錫隆恩相傳不替欽哉

至德元年八月十八日

賜布衣王升詔書銀絹椒藥詔

德清縣新志

卷十一
藝文

三十五

詔曰朕起草萊削羣雄攘夷狄安中國務欲天下承平邇者諸郡官吏不畏法律之嚴奸弊疊興御史臺管勾宇文桂因事被問囊中所藏書信百封悉係浙右儒吏獎譽之言或是或非皆欲禍人中間亦有私託求進者嗚呼昔元之初得天下人才皆務實學故賢能由公道而進後元之失天下世俗皆尙虛名故賊私於權門而用朕多涉艱難備知此矣立法未嘗不嚴而用法未嘗不審然賊吏貪婪如蠅蚋之趨朽腐螻蟻之慕腥膻噫若是者豈非慈父失教於平日耶抑其子之不孝不聽其父之訓耶今於百封書中得一善教其子者係浙右登科舉人王軫之父家書意望管勾宇文桂轉達平涼子之任所書未發朕偶獲見之書中語言諄切教以忠孝子之賢否雖未可知然薄俗中有善於爲人父者如此誰能出其右者勸善懲惡移風易俗實有國之善治其令中書遣人賚朕詔諭往詣其家賜白金百兩附子五枚川椒五斤絹十足以旌其賢令有司除本戶雜役依舊應當里長其弓兵不須再役欽此

洪武四年閏
三月日

勅浙江德清縣民蔡凱

勅曰國家施仁養民爲首爾能出稻穀一千四百餘石用助賑濟有司以聞朕用嘉之今特賜勅獎諭勞以羊酒旌爲義民仍免本戶雜泛差役三年尙允蹈忠厚勵鄉俗用副朝廷褒嘉之意欽哉故勅

正統七年四月初十日

勅禮部侍郎徐倬賜御製全唐詩錄序並以帑金刊刻文

在昔詩教之興本性情之微導中和之旨所以感人心而美謠俗被金石而格神祇故大舜以教胄子樂正以造俊秀蓋自二帝三王之世固已然矣文武成康之際王澤沛頌聲作洋洋乎洵足以繼薰風之操並卿雲之奏也自時厥後作者彌繁孔子從而刪定之使六藝彰明一經燦列錄其忠厚悱惻之辭以寓諷諭戒勉之意天道人事胥於是乎具焉漢魏以還尤多新製體例雖更前徽未邈至陳隋之末稍凌替矣唐之太宗致治幾於三代之隆躬自撰著一時文人才士將相名臣詠吟遞發藻采繽紛踵襲雅騷之迹光昭正始之音而歌行

律絕獨創兼能自遐古以來未嘗有也爰及盛唐逮乎中晚或與運會爲高下而凡緣時託志觸物攄懷形諸翰簡者皆卓然成一家之言弗可廢也朕萬幾餘閒環迴覽詠尋其指歸晰其正變而三百年升降得失之故亦因以可考焉於是論世觀人卽其章句攬其菁英勒爲成書置之几席每勤披閱加以精研迄於今已歷有年所矣頃以視河南巡至於江浙見比閭士庶有吹豳擊壤之風獻詩頌者絡繹於塗雖其工拙淺深各極其不齊之致而衢謳巷舞儼然省方之所采列國之所陳亦可見人情之愛戴而先王以詩爲教之義濡染而蒸陶之者所關甚鉅也翰林侍讀徐倬以全唐詩錄進展卷而讀之與朕平時品第者蓋有合焉嘉其髦年好學遷秩禮部侍郎以爲天下學者之勸乃取茲集親爲鑒定賜以帑金卽命校刊俾誦習者由全唐之詩沿波討瀾以上溯夫汾泗之傳而游泳乎唐虞載賡之盛其於化理人心將大有裨益也矣爲序以弁

著作

著述藝文之重要者也采錄本以成書行世者爲限然侯周兩志見書之有目而堪備搜訪者亦間采之惟搜登方法有殊侯以人著周以部分選擇俱見有法茲承周志例以著者爲綱以所著爲目但未分部藉便檢閱除已見舊乘或非關掌故者不錄外餘擇名聞較著者選載之用以彰構思十稔立言不朽之意耳

許宗彥著鑑止水齋文集十二卷 詩八卷

俞鴻漸著印雪軒詩文集 讀三國志隨筆

蔡之定著八箴草堂格言 積穀山房隨筆 古今文稿 進呈詩賦稿

徐養源著律呂臆說 琴學原始 周髀解 朝鮮疆域考 氏族譜

俞樾著羣經平議三十五卷 諸子平議三十五卷 第一樓叢書三十卷

曲園雜纂五十卷 俞樓雜纂五十卷 寶萌集五卷 又補一卷 外

集四卷 春在堂文編三十七卷 詩編十九卷 詞錄三卷 隨筆八卷

尺牘六卷 右台仙館筆記十六卷 茶香室叢鈔二十三卷 續鈔二

十五卷 三鈔二十九卷 又經說十五卷 雜著二十九卷 目錄各一

卷

傅夔梅著商巖遺書 濟世雜鈔 佐治錄

沈應昇著吳興文物考 吳興詩話 吳興園林考 古今詩文選 沈南征

詩稿 沈南征制藝

戴望著論語注二十卷 證文四卷 輯顏氏學記十卷 管子校正二十

四卷 謫麀堂集十卷

沈赤然著五硯齋詩文鈔 讀書隨筆 新市鎮續志

江毓荃著讀朱階梯 惕庵文集 清溪山麓詩集 附弟毓蓀怡萼軒詩稿

陳斌著白雲文集

徐鑑深著花樹軒吟草 居敬軒雜著

徐秉敬著約耕草堂詩存五卷 附徐師愈虛月軒吟稿

蔡夔著苜父詩鈔 說史詩鈔

徐端著安瀾紀要 迴瀾紀要

傅雲龍著經翼十卷 史徵八卷 說文解字正名十五卷 金石集成三百

卷 漢文五百卷 唐文精粹十卷

許善長著碧聲館吟草 詩餘談塵

戴銘金著妙吉祥齋詩詞集

徐彝承著青翠平安館詩文集

徐予嘉著亦有秋軒蟲吟四卷

徐紹著慕葭詩稿五卷

邵桂著愛餘樓詩稿

德清縣新志

卷十一
藝文

三十八

馮如璋著秋君遺稿六卷

徐璜著食舊德居吟稿四卷

徐球著還印廬集 附倪煒文夢花山館詩詞鈔 沈畦樂壽堂集

蔡壽昌著蛻石文鈔 香蘇閣詩草 說文質疑 清遠堂隨筆 吳興竹枝

詞

沈用霖著粵歸詩集 附沈承熙聞妙香室詩賦各一卷

徐芝淦著聽秋閣詩詞四卷

戴蕓著紅蕉菴詩集

沈鴻謨著濟世堂醫訣 附沈瑛醫方輯要

許德裕著游梁詩草 慈佩軒類編 消寒錄 暹暑錄

蔡鎮璠著述堂詩稿二卷 附弟銘珏瑤田遺草

吳曾貫著仕津要言 渭南河渠考 補硯齋詩集

徐本立著荔園詞序二卷 詞律拾遺八卷

徐士麟著雲在山房吟稿四卷

程肇奎著字學錦囊 地理輯要

傅范初著算學進階 算學源流考 電化理解 地理雜誌 會典圖說

海運利弊考 許學藝文志提要 學經韻齋文四卷 詩集二卷

徐本璿著安雅堂詩存

徐承福著歸省齋吟稿二卷 附弟承祿娛蘭仙館詩鈔 生花館詞各一卷

王 誠著松齋憶存草 疑題解略

金有恆著金子久醫案

李端臨著紅餘籀室吟草三卷 女藝文志三卷 續小名錄一卷

傅范淑著小紅榴室吟草二卷

楊克恭著蘭藻閣詩集

德清縣新志

卷十一
藝文

三十九

汪 璿著修竹吾廬詩集

梁德繩著右春軒詩詞鈔

錢斐仲著雨華盦詩餘

姚 端著霞閣詩存

趙德珍著得月樓存稿十卷

王蘊容著亦政軒詩稿

俞繡孫著慧福樓幸草

沈粟香著半潭秋水草堂吟草

徐畹蘭著鬢華陀室詩草

程 森著修德堂文存四卷 詩存 尺牘 筆記 雜鈔各二卷 德清縣

新志十四卷 鳳鳴
補註

補錄

沈約著宋書一百卷 齊書二十卷 梁武帝紀十四卷 晉書稿百二十卷
 邇言十卷 謚例十卷 宋文章志三十卷 文集一百卷 四聲譜
 沈該著易小傳六卷 文集五十卷 雜著一百篇 律詩五十首
 馬三才著自由堂稿 玉芝樓集 三巡奏議 鷓鴣雜錄 經史辨疑 春
 遊集 秋社稿

右係名著前志失載茲補錄之

卷十一勘誤表

頁	面	行	字	原	文	更	正	備	註
四	後	一	三	有		於			
五	前	七	二十九	樂		疑			
十一	後	六	一	塵		塵			
十六	前	二	十二	有		題			
二十	後	三	八下	(脫字)		電			
二十八	後	十	六	文		今			
三十四	前	九	十二	禱		禱			

文內應併改

德清縣新志卷十一終

